



Inatsisartuni ilaasortaq Iddimanggiu Bianco

Inuit Ataqaqatigiit

/ Maani

### **Inissiat pillugit § 37 naapertorlugu apeqqutit**

*Asasara Iddimanggiu Bianco!*

Inissianut Namminersorlutik Oqartussanit sananeqartunut akisussaaffiup inissisimaffia pillugu tunngaviumik apeqqutinut akineqarnissannik kissaateqarputit.

Sanaartornermut inatsit – tassalu maanna sanaartorneq pillugu Inatsisartut inatsisaat nr. 13, 26. maj 2010-meersoq – naapertorlugu piffissami pineqartumi illumik piginnittuusup illup inatsisinik malinniffiunissaa akisussaaffigaa. Tassalu sanaartornermut inatsimmi § 16 naapertorlugu illumik piginnittoq pisussaavoq, pissutsit sanaartornermut inatsimmi aalajangersakkanik imaluunniit inatsit naapertorlugu peqqussusiarineqartunik uniuiffiusut iluarsissallugit. Pissutsit inatsisinik uniuiffiunerannut piginnittoq akisussaatinneqarsinnaagaluarpalluunniit tamanna atuutissaaq.

Sanaartortoqartillugu sanaartornermut inatsimmi aalajangersakkat malinneqarnersut kommuninit nakkutigineqartarpoq. Pissutsit sanaartornermut inatsimmi piumasaqaatinut naapertuutinnigitsut Kommunimit paasineqarpat, kommuni pisussaavoq pissutsit inatsisit malillugit iluarsineqarnissaat sulissutigissallugu. Tamanna sanaartornermut inatsimmi § 18, imm. 3-mi allassimavoq. Taamatut pisoqartillugu nalinginnaasumik Kommunip piginnittoq piumaffigisarpaa inatsisinik unioqquitsisimaneq iluarsiiffigineqassasoq.

Inatsisinik unioqquitsitsisoqarsimatillugu Kommunip iluarseeqqusilluni peqqusineranik malinninngitsoq, eqqartuussivitsigut piffissap aalajangerneqartup iluani pissutsinik iluarsiinissamut peqquneqarsinnaavoq, aammalu pinngitsaaliissummik akiligassanik takkuttartunik akiliinissamut eqqartuunneqarsinnaalluni.

Sanaartornermut Inatsisartut inatsisaanni pingaarnertut siunertaavoq, qulakkiissallugu

- ikuallattoornissaq, isumannaallisaaneq peqqinnissarlu eqqarsaatigalugu illut naammaginatsumik toqqissisimanartunngorlugit sananeqarnissaat ilusilerneqarnissaallu, aamma
- illut nunaminertallu sanaartorfiunngitsut taakkununga atasut atorfissaattut siunniussineq isumannaatsumillu aserfallatsaaliuinissaq eqqarsaatigalugit naammaginatsumik pitsaassuseqarnissaat.

Den 16. juni 2015  
Sagsnr. 2015-115732  
Dok. Nr. 1992632

Postboks 909  
3900 Nuuk  
Tlf. (+299) 34 50 00  
Fax: (+299) 32 52 86  
E-mail: isan@nanoq.gl  
www.naalakkersuisut.gl

Naalackersuisut sanaartornermut inatsit naapertorlugu Illuliornermut Malittarisassat 2006 suliaraat, taamaalillunilu ilaatigut illut atorneqarnerini isumannaassutsimut piumasaqaatit minnerpaaffissaannik atuutsitsisoqalerpoq.

Matuma kinguliani apeqqutit ataasiakkaat issuarneqarput, akissutitaannik malitseqartinneqarlutik.

**1. Eqqortuua Kalaallit Nunaata Namminersorlutik Oqartussanit inunnut inissiassatut pilersinneqartut sillimaniarnermut piumasaqaatit inatsisini allassimasut eqquutsinngikkaat, tamatumani ungaluusiak akunneqassusiisa akuttoqatigiinneri?**

**AKISSUT:** Inissiat pineqartut piginneqatigiilluni inissiatillit peqatigiiffiisut namminersortutut sananeqarput aammalu Illuut A/S-imit pigineqarlutik. Suliat soorunami illuliornermut malittarisassani maleruagassat malillugit pilersaarusiugaapput, taamatullu kommunip teknikkimut sullissiviani sanaartornermi suliatut nalinginnaasut suliarineqarlutik pilersaarusiorneqarsimallutik. Tamatuma kingorna aamma paasinarsivoq, suliani sanaartornermut malittarisassani maleruagassat malinneqarsimasut. Taamaalilluni paasinarsivoq sanasut suliaat pilersaarutit malillugit suliarineqarsimangitsut.

Sanaartornerup ingerlanneqarneranut atatillugu sanaartukkat nakkutigineqarput, taamatullu sanaartorneqartut atuilernissaannut akuersissut tunniunneqarsimavoq suliami ungasissusissanut piumasaqaatit ilaat naammassineqarsimangitsut malugineqanngitsoorlutik.

Naalackersuisut nalunaarfigineqarput, aneerasaartarfii ungalui sumiiffinni arlalinni illuliornermut malittarisassani aalajangersakkat uniorlugit suliarineqarsimasut. Tassalu aneerasaartarfinni, ungalut iikkallu silarliup akornanni peqqussutit malinnagit ammanilerlugit ikkussuunneqarsimasuni atuisunut toqqjissisimanartumik isumannaassuseqarnissamut piumasaqaatit malinneqarsimasut isigineqarsinnaanersut tunngavissalimmik nalornissutigineqarpoq.

Aamma Naalackersuisut ilisimatinneqarput, tamatuma kingorna Illuut A/S-ip inissiani pineqartuni aneerasaartarfii ungaluisa tamarmik misissorneqarnissaat, aammalu amigaatit ingerlatseqatigiiffimmit sanaartugassanik suliakkinneqartartumit (entreprenørselskabimit) sanasuumit iluarsineqarnissaat suliniutigisimagaa. Iluarsaassisoqareernerani ungalut illuliornermut malittarisassani isumannaassutsimut piumasaqaatinik malinniffiulerput.

**2. Taamaattoqarsimappat Naalackersuisut pineqartumut qanoq isummerpat?**

**AKISSUT:** Naalackersuisut isumaat malillugu sanaartornermik suliaqartartut pikkorissusaasa qaffassarneqarnissaat pisariaqarluinnarpoq. Sanasut suliaqartut sanaartorneq pilersaarutit malillugit suliarisussaavaat, aammalu suliaqarfiup iluani pitsaassutsimik misissueriaatsinik atuisoqartariaqarpoq, taamaalilluni sanaartugaq pilersaarutit malillugit eqqortumik tunniunneqarsinnaassamat. Tamatuma saniatigut nakkutilliinermik ingerlataqartut pikkorissutsimikkut qaffassarneqassapput, taamaalillunilu kukkunerit malugineqarsinnaassapput aaqpinneqarsinnaassallutillu. Tassalu sanaartornerup pitsaassusia kisimi qaffanneqassaaq.

Matuma siuliani taaneqartut paasineqarpoq, pilersaarusernermi illuliornermut malittarisassani piumasaqaatit naammassineqarsimasut, kisiannili suliarineqarnerani taanna malinneqarsimanngitsoq. Siullermik entreprenørrip sanaartortinneqartup tamanna malugisimasariaqaraluarpa iluarsisariaqarsimagaluarlugulu. Aappaattut nakkutilliisut tamanna paasisimasussaagaluarpaat, amigaataasorlu aqqeqqullugu uparuarsimasussaagaluarlugu.

Naalackersuisut isumaqarput, sananermi sumiginnaanerit, isumannaassutsip pitsaannginneranik, aammalu ajutoorsinnaanermik kinguneqartut taamaattut akuersaarneqarsinnaanngillunnartut. Kisiannili maannarpiaq ungalut kukkusumik suliarineqarsimasut iluarsineqarsimanerat, taamaalillunilu isumannaassutsip iluarsivigineqarsimanagera Naalackersuisut naammagisimaarpaat.

### **3. Aneersaartarfimmi ungaluusiak akunneqassusiisa akuttussusaat pillugit Namminersorlutik Oqartussat innutaasunit qassinit saaffiginnissutinik/ maalaarutinik tigusaqarpat?**

**AKISSUT:** Ajutoortoqarnera siqqullugu Namminersorlutik Oqartussat maalaarutinik tigusaqarsimanngillat. Inissianik attartortittakkanik aqutsisoq pisumi aalajangersimasumi minnerpaamik ataatsimi ataasiarluni arlaleriarluniluunniit najugaqartut sinnissaanniit aneersaartarfimmi isumannaassutsip amigaataanera, apequt 1-imut akissummi taaneqartoq pillugu saaffigineqarsimasoq Naalackersuisut ilisimavaat. Aqutsisup sanaartornermi nakkutilliisooq nalunaarfigisimavaa, taassumalu ingerlatseqatigiiffik sanaartugassanik suliakkinneqarluni sanasusoq piumasaqarfigisimavaa, isumannaassuseq illuliornermut malittarisassat naapertorlugit iluarseqqullugu.

### **4. Naalackersuisut pineqartumut aqqiissutissanik qanoq iliuuseqarpat?**

**AKISSUT:** Suliaq Naalackersuisunit suliarineqartussaangilaq, kisiannili illumit piginnittumit, tassalu Illuut A/S-imit suliarineqartussaalluni. Ajutoortoqarnerani erngerluni najugaqartut tamarmik mianersoqquneqarlutik nalunaarfigineqarput, aammalu kukkunermit iluarsiniarluni suliniutit aallartinneqarput.

### **5. Naalackersuisut qulakkeersinnaanerlugu inunnut inissiat tamarmik Namminersorlutik Oqartussanit pilersinneqartut siunissami inatsisitigut Namminersorlutik Oqartussanit piumasaqaatit nammeneq atuuttussangorlugit allattugaataat pilersitsinerni eqquutsinneqassasut, tamatumani aneersaartarfimmut tunngasuni?**

**AKISSUT:** Naalackersuisut sanaartornermi pitsaassuseq isumannaassuserlu qulakkeerniarlugit maleruagassiorparput. Maleruagassat taakku malinneqarnissaat soorunami siunertaavoq. Naalackersuisut naalackersuisoqatigiillu sanaartornerup iluani pitsaassutsip qaffassarneqarnissaa pingaartittorujussuaat. Ilaatigut Sanaartorneq pillugu Isumasioqatigiissitsisoqarpoq, taamatullu sanatitsisut nakkutillisarnerannut pikkorissartitsisoqarluni. Kisiannili suliami illuatungeriit tamarmik ingerlaavartumik ilinniartinneqartariaqartut Naalackersuisut nassuerutigaa – tamannalu entreprenørinut, sanaartornermit ingerlatsisartunut aammalu siunnersortinut, sanaartukkamik nakkutilliisunut atuuppoq.

Sanaartukkani iluarsaassinernilu nutaanerusuni arlalinni suliani kukkusoqartarneratigut amigaateqartoqartarneratigullu pitsaassuseq ersarissumik ajornartorsiorfiusoq paasineqarmat, Naalackersuisut suliniutinik ingerlareersunik arlalinnik, ajornartorsiutit qaangerniarnerinut iluaqutaasussanik ingerlatitseqqipput.

Suliniutit ilaattut Namminersorlutik Oqartussat sanaartugassaataannik aqutsineq 1. april 2014 aallarnerfigalugu Ineqarnermut, Sanaartornermut Attaveqatigiinnermullu Naalackersuisoqarfimmi sanaartornermut immikkoortortaqaqarfimmut katersuunneqarput. Suliat tullerijaarinikkut aammalu sanaartornerit ingerlanerini pitsaanerusumik uppersaasiortarnikkut, kiisalu suliassat aaqqiiffigineqartarnerisa ingerlaavarnissaannik qulakkeerinikkut ataatsimut isigineqarsinnaalernissaat siunertarineqarpoq.

Suliniuummi allami pikkorissartitsisoqarpoq, sanaartornermik aqutsinermi oqarsinnaatitaaffiit nukittorsarneqarnissaannik siunertaqarfiusumik. Pikkorissartitsisarnerit siorna aallartinneqartut, aammalu sanaartornermi suleqataasunut tamanut neqeroorutigineqartut ingerlaqqinnissaat eqqarsaatigineqarpoq. Sanaartornermi kukkunerit amigaatillu ikinnerulernissaannut nunatsinni ilinniartitseqqittarnerit aammalu piginnaaneqarfinnik annertusaanerit aqutissat ilagigaat Naalackersuisunit qularineqanngilaq.

Soorunami pisortat inissiaataanni sanaartornermut malittarisassat malinneqartussaapput, taamaalilluni inissiaatigut sukkulluunniit najugaqarfignissallugit pitsaasuussammata, peqqinnartuussammata isumannaatsuussallutillu. Kisiannili sanaartornerup ingerlanerani suleqatissarpasuit akuutinneqartarput: siunnersortinit pilersaarusiortuniit sanaartornermik suliffiutilinnut aammalu ingerlatseqatigiiffinnut sanaartugassanik suliakkinneqartartunut, kiisalu sanaartornermi aqutsisunut/nakkutilliisunut oqartussaasunullu. Sanaartornermut inatsisit naapertorlugit malittarisassanik qulakkeerinissaq Naalackersuisunit angorusunneqarpoq, aammalu suleqataasut taakkuninnga malinniinnarpata, sanaartornermi kukkunerit pinngitsoortinneqarsinnaassapput.

Naggasiutigalugu erseqqissaatigissavara, nukappiaqqap 14-inik qaammatillip inissiami aneerasaartarfimmiit nakkarsinnaaneranut akisussaaffik pillugu suliaq suliarineqartoq, taamaattumillu aalajangiiffigineqarsimanngitsoq iluoomat.

Inussiarnersumik inuulluaqqusillunga

Knud Kristiansen